

եր, երբեմն մատների վրայ թոեր եր հաշուում: Բայց ինձ զարմացրեց մի բան, երբ նա նամակներից մեկի վրայ քսեց մի հեղուկ, եւ իսկոյն առաջոյ տողերի մեջտեղում յայտնուեցան նոր տողեր՝ բաց-կանաչագոյն տառերով: Որտե՞ղ էին թաքնուած այդ տառերը: Ես չհամարձակուեցայ հարցնել, երբ նկատեցի, որ նա դեռ ոչ բոլորովին հանգստացած էր:

Նամակները կարդալուց յետոյ նա բոլորը այրեց: Այժմ միայն ուշադրութիւն դարձրեց իր մօտ դրած տառեխների եւ օղիի շիշի վրայ:

– Վանայ տառե՛խ... որքան ընտանիքներ ապրում են միայն այդ փոքրիկ ձկներով, – բացականչեց նա եւ սկսեց ուտել: – Դու չե՞ս սիրում, – դարձաւ դէպի ինձ:

Ես ախորժակ չունէի մի բան ուտելու: Ճանապարհի յոգնածութիւնից սաստիկ ջարդուած էի: Հանգիստ եւ երկարատեւ քունը միայն կարող էր փոքր ի շատե կագդուրել ինձ: Բայց Ասլանի հոգը չէր. այդ երկարթի մարդը չգիտեր, թէ ի՞նչ է հանգստութիւնը: Նա անհամբերութեամբ սպասում էր վարպետին: Շատ չանցաւ, վերադարձաւ նա եւ, տարած զէնքը իր տեղը դնելով, մի քանի անգամ անցուդարձ արեց սենեակի մէջ, ինքն իրան կրկնելով:

– Անտանելի՛ է... անտանելի՛ է... մինչեւ ե՞րբ... համբերութիւններս հատաւ...

– Ինչպե՞ս վերջացաւ ձեր արշաւանքը, – հարցրեց Ասլանը ժպտելով:

– Մինչեւ իմ հասնելը՝ ամէն ինչ վերջացած էր, քողերը իրանց գործը կատարել էին... – պատասխանեց նա՝ լեղակի կարասների մէջ կապոյտ գոյն ստացած ձեռքերը տրորելով եւ միեւնոյն խօսքերը կրկնելով: – Համբերութիւններս հատաւ... էլ համբերութիւն չմնաց... մինչեւ ե՞րբ...

Ասլանի մեղմ ժպիտը ծիծաղի փոխուեցաւ:

– «Համբերութիւնը կեանք է», այդ խրատը աւանդեցին մեզ մեր պապերը, – ասաց նա, հեզնական կերպով նայելով վարպետի վրայ:

– Այո՛, բայց ամէն համբերութիւն իր չափն ու սահմանն ունի, – պատասխանեց նա, շարունակելով կապոյտ ձեռքերը տրորել: – Իսկ մեր համբերութիւնը անզգայ դիակների համբերութիւն է, եւ աւելի ոչինչ:

Ասլանը այժմ լուրջ դէմք ընդունեց:

– Պատմեցէք, բանը ինչու՞մն է, – հարցրեց նա: